

ԱՆԳԼԻԱԿԱՆ ԵԿԵՂԵՑԻ

Անգլիայում եկեղեցու ընկերվարական—տնտեսական գործին մասնակցելու խնդիրն առաջ եկաւ երկրում գոյութիւն ունեցող բանւորական ճգնաժամի շնորհիւ, որի հետեանքն էր աշխատանքից դուրի ահագին խմբերի գոյութիւնը, որոնք մեծ հոգածութիւն պատճառեցին պարլամէնտական գործիչներին և քրիստոնէական ընկերվարական միութեան: Անգլիական եկեղեցին գիտակցում է իւր պարտականութիւնը՝ միացնելու իւր աշխատանքը չարիքը մէջտեղից վերացնելու համար և ինչպէս բացատրում է «Church Times», դրա համար լաւագոյն միջոց է համարում աղգել առանձին անհատների խղճի վրայ, կոչ անել չարիքի դէմ մաքառելու, մի խօսքով՝ քարոզել սօցիալական գործունէութեան իդէալը և յիշեցնել հասարակութեան, որ չի կարելի ոչ մի մարդու յանձնել իրեն ճակատագրին:

— Հասկանալու համար, թէ անգլիական հոգևորականութիւնը ինչպէս է գործադրում քրիստոնէական ընդհանուր սկզբունքները ժամանակակից սօցիալական տնտեսական խնդիրներում, բաւական է առաջ բերել մի խումբ հոգևորականների յայտարարութիւնը Չեմբերլէնի անտէր երկիրների յափշտակութեան և դանձարանի շահերի պաշտպանութեան ծրագիրների դէմ: Այդ յայտարարութեան տակ ստորագրող անձինք ուշադրութեան են առնում մտադրուած բարեփոխութեան բարոյական կազմը և որպէս «աղգային խղճի պատասխանատու» անձինք, իրենց իրաւունք են համարում յայտնել իրենց դիտողութիւններն այդ մասին: Նրանք բողոքում են Մեծ Բրիտանիայում հովանաւորող կարգերի (պրօտէկցիօնիզմի) դէմ, որովհետեւ, ինչքան էլ անկեղծ և հայրենասիրական լինին նրա պաշտպանների միտումները, այնուամենայնիւ նրանք առաջ են բերում այնպիսի դրդող պատճառներ և տրամադրութիւններ, որոնց դէմ իրանք սովորաբար բողոքել են որպէս անբարոյական երևոյթների դէմ:

Մասնաւորապէս մասնանիշ են անում այն հանգամանքը, որ նա սաստկացնում է աղգերի միջի բաժանումն, տանում դէպի կաշառակերութիւն, մենավաճառութիւն և օգտակար է հանդիսանում մի միայն զօրաւորների համար:

